

文登縣志卷十四

災異

天災人害乃陰陽五行沴氣所聚聚之久而反其常其始甚微其終甚鉅焉春秋書災而不書祥聖人之意若曰令人喜不若令人懼也又春秋之例有螽無麥與會盟征伐編年並列蓋天災人害病民則同弭禍防患但賴人事以補救之今將舊志所載兵事災異二門合並為一而削平寇亂與出粟賑饑易禍為福者各書於本事之下止奸除暴感召和嘉人事既得天復其常則不得委為氣數之適然矣

魏

魏武時東牟人王營聚眾三千餘家脅昌陽縣為亂長廣太守何夔遣

王欽等授以計略旬月皆平三國志何夔傳

按東牟即甯海州漢舊縣昌陽即文登亦漢舊縣昌陽與東牟鄰壤故王營脅之為亂晉元康八年始移昌陽於今萊陽縣耳今昌陽故城中水衝水裂無數瓦礫或毀於王營之亂不可考矣

隋

文登縣志 卷十四

災異

一一

隋政荒天下大亂四方盜起涇于難據文登高祖武德四年涇于難降

新唐書

唐

會昌元年秋雨雹破瓦害稼

府志開運二年文登地內湧出金銅佛像四此蓋古廟所陷水衝佛見無關災祥也

宋

淳化元年大饑 靖康末盜起城陷學舍悉為煨燼郭長倩學宮記

金

天會六年大水

大金國志天會八年立劉豫於大明府國號大齊改元阜昌將山東百姓六十以下二十以上皆籤發為兵每畝田科錢五百玉清宮記齊阜昌中法令苛急賦役繁重

大定十六年旱蝗

貞祐二年甯海郝儀搆亂入崑崙山焚燬寺宇殆盡玉清宮記貞祐末饑饉薦臻陰陽爲沴干戈迭興

元

元貞元年冬十月大水 二年冬大水 大德元年饑八月大旱 天

歷二年大饑 至順元年大饑

元史文宗紀至順元年甯海州文

登牟平縣饑賑以糧三千石

至正二十三年好妨生

明

永樂四年倭寇威海衛指揮扈甯力守三日都督統兵來援始退 六

文登縣志

卷十四

災異

一一

年倭犯靖海衛指揮僉事鄭剛帥百戶逆戰敗績是年倭寇成山頭掠白峯頭羅山等寨始置備倭都司 十四年倭舟三十二艘泊靖海衛之揚村島都督同知蔡福等率兵合山東都司兵擊之

正統六年大饑義民邢智出雜糧一千一百石賑之詔旌其門

成化六年大饑義民畢叔廣曲興楊斌等各出粟助賑詔旌其門

宏治十六年大旱知縣李敬賑之是時連歲旱沴威海王敬谷翺等各出穀濟衛人旌授義官

正德元年七月初六日大雨海水忽逆流三十餘里禾稼淹沒 四年

大飢人相食 七年三月十三日文山始皇廟內鐘鼓齊鳴少頃殿焚是日流賊劉六劉七等攻入縣城營衛不救縣內大亂鄉官于通生員

鞠鉞鉞妻于氏罵賊死之

舊志誤作六年

八年四月隕霜殺稼飛蝗蔽日

十一年旱潦爲災

嘉靖七年大饑死者載道

十二年大饑邑人陳諫出粟賑之死者爲

之掩埋

十八年秋大水澤頭集李鏗家有龍破壁而出雹隨之

十五年大水九月雨雹地震如雷

二十六年大饑鄉官叢磐白於當

路修城池招商賈先世積穀數千石盡散與饑民多所全活

三十一

年倭犯靖海衛指揮使商祖堯等擊退之

三十二年大祲且疫癘邑

人楊舉埋葬二百餘人威海衛丁時舉郭珩畢卿等俱出穀助賑旌授

義官 三十四年倭船阻風泊威海之栲栳島官軍不能前數日持刀

出官軍獲之

文登縣志

卷十四

災異

隆慶四年秋大水禾稼盡淹漂民廬舍南門外河水泛漲城不沒者三
版邑人邵梗禱於大士水退因築抱龍庵以鎮之

萬曆四年三月風雨狂暴禾苗盡傷

八年萬石山崩 十年秋雨雹

湯泉溢豆盡傷

十三年大饑

十七年秋大雨

二十五年地震有

聲次年開礦礦使侵擾山脈壟岡多被鑿斷

四十一年七月初七日

午有黑氣自東北來颯風暴作大雨如注經三晝夜廬舍傾圮老樹皆

拔禾稼一空

四十三年大旱自三月不雨至七月初九日始雨又至

九月不雨蝗蝻遍野人噉木皮城幾罷市邑人邵君儀煮粥賑之全活

者衆 四十四年大饑斗粟千錢人相食餓殍載路村舍爲墟知縣張

九經煮粥賑之邑人于東齊出積穀數百石給散貧民鄉官劉啟先煮

粥賑饑農人石國富亦出粟助賑威海衛指揮僉事陶繼祖捐俸煮粥多所全活

泰昌元年春淫雨夏旱七月初八日大風拔木折屋壓死人物甚衆禾稼盡毀馬頭海口傷運船九十六艘溺死水工百餘人知縣孫昌齡有

申風災文詳名宦

天啓元年四月十八日風傳賊至百姓驚竄自文登至昌邑八百里訛言時日皆同秋地震 二年蝗 六年五月管山等里雨雹大如雞卵東西八十里二麥俱傷閏六月大雨淹禾七月大風拔木

崇禎十一年春不雨夏蝗飛蔽天食穀殆盡秋螽蟻遍野蝗復大起無禾 十二年飛蝗蔽空饑 十三年大旱飛蝗蔽天傷稼秋大饑 十

文登縣志

卷十四

災異

四

四年大饑斗粟錢二千民死大半人相食 十六年二月 大兵駐登州萊棲甯文四州縣皆失守十三日破成山衛 十七年李自成分賊黨邢某爲邑令萊陽鄉官宋璜起義兵殺之

王志李自成陷京師分賊黨君子營僞官各省邢某令文登不一月萊陽鄉官宋璜起義兵討賊遣數騎詣縣斬僞令於城下邑人葬之香巖寺東路旁寒食諸節尙有以紙錢數百爲之掃墓者又相傳邢某善術數預知死日果驗

國朝

順治七年春夏旱秋大水禾稼盡淹知縣尙可學煮粥賑之 十八年秋棲霞于七倡亂據岵嶠山禪教寺匪僧常和尚與張振綱等共謀攻縣城十月十九日常和尚自禪教寺率衆聚於香巖寺城西等處張振綱自侯家集率衆聚於三里廟城東等處放火焚掠圍縣城知縣李蔭

澄守禦七晝夜都司王允升以二百騎來援射中張振綱賊退保文山廟允升以火攻之焚死無算城得以全

康熙元年常和尚復聚衆據崑崙山文登營副將劉進寶乘雪攻山常和尚逃至青石菴自縊磔其尸巢穴悉平 四年地震大旱巡撫周有德具題蠲免本年租賦 七年六月十七日地大震聲如雷城垣民舍多傾圮烈風三日禾稼盡傷饑 九年冬大雪平地丈餘人多凍死十二月崑崙紫金崗崩 十年六月十三日大雨海溢漂損廬舍禾稼盡淹衝壓田地二百五十餘頃知縣邵沆有申水災文蠲免本縣錢賦十分之二 十一年文登營兩雹稻盡傷 十六年十二月知縣吳閏啓同守備潘元亮在察院放餉尅蝕餉銀怨言煩興梟卒劉天成等乘機

發難露刃譁譟元亮踰牆走天成刃傷閭啟擁至文登營毘盧庵中閭啟創漸平匿不報 十八年四月總兵何傳訪知劉天成潛匿蓬萊擒斬之傳首營中副將吳起龍令全營孝服泣迎爲總河靳輔所劾知縣免議吳起龍伏法遂裁左營改設甯福營 二十一年五月初六日雷震塌縣署二堂 二十四年三月大風拔木 二十八年春饑 三十年七月飛蝗突至食禾東至十里頭遭雨斃之 三十五年水大饑知縣朱應文煮粥分賑之三十六年春發常平倉穀賑之民有餓死者鄉官于其珩施粥賑濟死者掩埋之 四十年五月文登營兵譁噪火炮擊碎轅門衆聚文山聲言副將葉紀宣淫不道凌虐兵丁知縣佟國瓏出城曉諭始歸營總兵劉官統遂劾紀不職並擒倡難者斬之 四十

二年春大水五月大旱至八月不雨大饑人相食 上命截漕自直沽口入海旗員四人分賑文登自十一月起至明年五月止是年夏秋復疫民死幾半連免三年田租 七月海賊寇威海衛總兵王文雄躬往調度放炮一日賊在洋中演劇自若文登營副將張陳武欲乘舟火攻文雄不許相持數日賊乃颺去 四十三年春仍饑民死大半榆皮柳葉皆盡至食屋草黃山集聚賊數百晝入人家劫掠張陳武夜率精騎百人擒其渠魁餘皆散去 四十八年秋雨傷禾稼饑 五十六年八月雨雹 五十八年七月大雨水溢漂溺廬舍禾稼盡傷迎仙都尤甚知縣王一夔申請於桃花村開廠煮粥自十二月起至明年四月止仍借穀接濟

雍正二年冬大雪 四年饑邑人湯之翰捐粟賑濟 九年春飢
乾隆四年先旱後澇飢 五年春 詔免關口糧稅關東糧艘入境不絕又開倉平糶民不爲災是年五月雨雹 十一年夏大雨傷禾 十二年春旱六月淫雨而月十三日高村河西厓突開一洞深杳無底其夜雷雨附近村落落地皆震前此人見泉源中物有鱗角疑爲龍至是騰去七月十五日烈風拔木雨復大作禾稼盡傷 十三年秋飛蝗蔽日蠲租賦 十七年大水饑巡撫阿奏令商人赴關東採買雜糧免其征稅糧艘接入民賴全活邑人王廷選徐伸出粟賑饑知縣旌其門 二十年七月大風雨傷禾稼屋垣傾圮者半 二十六年冬大雪雁鳧多凍死 三十一年夏大旱 三十二年三月大風拔木折屋 三十六

年二月大風拔木越二日又大風 三十七年春大旱 三十八年六月初二日雨至九月止傷禾稼屋舍傾圮饑 三十九年二月大風連日折屋拔木八月蝗 四十年夏大旱八月雨雹 四十二年五月雨雹 四十六年六月大風雨傷禾折屋 四十七年春旱五月大雨雹傷禾稼八月大雨浹旬禾稼半死穀穗生芽 四十八年二月大風折屋自正月至五月不雨 五十年八月雨雹 五十一年正月大風雨土歲大饑邑人劉曰和施糜粥賑之 五十三年秋多雨 五十四年五月大風 五十六年七月大風雨 五十八年八月大雨雹 五十九年夏旱 六十年夏旱螟食禾秋無雨

嘉慶元年春雨水 二年夏旱 三年海洋盜船泊於文榮間之石島

文登縣志

卷十四

災異

七

鎮鄒島登岸劫掠居人驚竄文登營巡禦乃靖

陽谷小識

四年正月地震

七月大風雨傷禾稼 六年自春至秋無雨草木盡枯大饑 七年十

月蝗食麥苗殆盡 八年春大雪 九年七月大風禾稼盡傷 十年

七月雨雹 十一年四月雨雹 十二年五月雨雹 十五年野狼噬

人 十六年四月地震五月初三初四震初五初八十四日震六月九

月又震是年春旱秋大水大饑 十七年春大饑道饑相望斗粟千餘

錢榆皮柳葉採食皆盡疫死者無算知縣宋銘申請平糶發常平倉穀

設廠五處至麥熟止 十八年狼復爲害 二十一年狼害更烈合縣

召募獵戶協力捕之至二十三年始息 二十三年六月大雨平地水

深數尺抱龍河自城之東南隅決入郭家河南關居民皆溺於水典史

王書山募人腰繩拯救多所全活 二十四年六月大風雨禾盡傷饑
道光元年秋雨水螟食禾殆盡八月人患痧症至十月止 三年六月
地震 十五年有雙桅夾板夷船一隻駛入內洋檄沿海口岸嚴杜奸
民接濟旋抵威海口閱三日抵崆峒島知府英文總兵周志林馳往驅
逐旋出洋南去是年春旱六月雨四十餘日乃止禾菽淹沒知縣歐文
申請平糶發常平倉穀三千石 十六年春復出穀三千石以濟民貧
二十一年正月二十六日大風雪人畜凍死無算 二十七年饑甘
泉寺僧廣志出糶糧數千石貸於附近貧民 自十五年後海賊屢劫
商舟拘人勒贖官軍戰多不利二十九年官募廣東艇船捕之多所斬
獲 三十年六月登州水師後營經制外委范景增_{膠州人}遇賊於劉公

島外力戰死之義勇孫峨等四十一名同遇害威海公設神牌於東城
文昌閣下祀之

咸豐二年二月大風晝晦 三年七月大風雨傷禾稼 七年夏蝗不
爲災 十年夷船大至始泊威海口奪民船爲筏遂由烟臺入天津
十一年春徐州捻匪李成張閔刑等東竄由青萊至登州放火焚掠屠
害居民九月初六日入甯海初七日薄城下初八日焚甯之關廂初九
日東犯邑境文榮兩縣合力守崑崙山口三十餘處鄉民更番堵禦憑
高據險勇氣百倍邊馬屢至衆掀巨石衝擊之賊不能入初十日遂南
犯海陽等處

同治元年於山口南北築立石牆計長一百六十餘里是年秋癘疫大

作民多死亡 六年捻首任柱賴蚊光張總愚等率衆十餘萬搶渡運河東竄萊州五月抵萊陽犯海陽行村寨等處遂攻烟臺爲洋礮所卻大帥定棄地困賊之策於膠萊河西岸築立長牆分兵扼守萊登諸縣徧遭蹂躪村無完戶六月十五日賊撲甯海州去邑密邇知縣陳汝楫出示曉諭居民辦理守城事宜並諭各村丁壯齊赴山口防禦榮成知縣亦催人赴口賊於甯海海陽等處搶劫焚掠知文榮有備卒不敢近山口一步石牆之力也

光緒二年夏大旱草木葉皆枯秋大雨禾盡傷大饑三年春復大饑知縣王廷錦紳耆畢瀚昭等等籌春貸秋還之法共貸富民銀萬餘兩分給各鄉貧民復發倉穀濟之全活甚衆威海則候選同知王沛借貲召商

糴關東雜糧源源接濟北海饑民無餒死者 五年五月大雨四十餘日不成災六月十四日大風拔木折屋禾稼盡偃 十七年七月十一日大雨海溢河水暴漲東南鄉之高村集東北鄉之橋頭集西南鄉之周格莊望仙莊嶺東村澤頭集橋上村邢家島姚山頭諸處衝毀廬舍數千間田地萬餘畝自嘉慶二十三年大水至是六十餘年復遭水害 十八年夏旱秋大雨 十九年春饑御史謝雋杭 奏請平糶緩征 是年夏復旱秋歉收 二十年十二月日本由榮成之龍鬚島登岸二十五日陷榮成明年正月攻破威海水師提督丁汝昌以劉公島降自鳩死十二日日本別部攻縣城破之山東巡撫李秉衡 奏發制錢五千貫知縣裘祖諤稟請開常平倉賑濟被寇難民

修志非易也尙簡畧者遺故實矜繁重者昧義法今之志書千帙一律
弁序盡統同之語旁採多無稽之言星宿辨寰海之封疆而彈丸是屬
沿革爲志書之樞紐而謬鑿相因嗜新奇則目錄全更貪合併則檢查
徒費甚至人物則例擬范班金石則博同歐趙而不知志自有體義不
同歸稗官是錄猶質劑而登史宓列傳高標亦胥徒而膺旒冕故因陋
就簡者失之麤好博騁奇者尤失之炫竊嘗欲依 大清一統志例私
創吾邑志稿存之家而未果而同學澤春實先我而爲之上窺古編搜
討已歷寒暑旁參說部掇拾不遺錙銖擷文山之菁華闡不夜之奧密
蓋有年矣歲在壬辰澤春來主濰陽書院講席一日出其所爲文登志
相質余喜鄙見之有合也於是上下千古縱橫劇談贈我不啻百朋褒

君詎無一字屬辭比事敢云祖述春秋仗義執言庶幾掃平僭亂爰識
數言而歸之災諸梨棗倘亦藝林之所不廢也乎濰縣張昭潛謹跋

文登縣志校勘記

卷十一上

列女

劉遵凡 凡當作尼

丁化義 丁當作于

馬氏秀 氏當作士

儒童林鍾鈴于妻氏 于妻氏當作妻于氏

宗元址 宗當作宋

宋廷義妻宋氏 疑有誤俟考

徐元挺 挺當作艇

衆始死者 始下脫知字

文登縣志

校勘記

卷十一下

列女

仰視白日為光陰 為當作無

卷十二

釋道

尤精灸法 灸當作灸

悉屬解囊自辨 辨當作辦

卷十三

土產

至防風黃苓 苓當作苓

卷十四

災異

水衝水裂 水裂當作土裂

